

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ժ. Տարի, Թիւ 445, Ուրբաթ, 13, ՅՈՒՆԻՍ 2018

ՀԱՅԿԱԿԱՆ

Բրիտանիոյ Խորհրդարանի Ստորին Պալատը Վաւերացուց Հայաստան- Եւրոպական Միութիւն Համաձայնագիրը

Բրիտանիոյ խորհրդարանի ստորին պալատը Չորեքշաբթի օր վաւերացուց Հայաստան-Եւրոպական Միութիւն Համապարփակ եւ ընդլայնուած գործընկերութեան համաձայնագիրը՝ զայն վերջնական վաւերացման համար փոխանցելով Լորտերու պալատին: Այս մասին «Թուիթըր»-ի վրայ գրառում կատարեց Բրիտանիոյ մէջ Հայաստանի Հանրապետութեան դեսպանատունը:

Համաձայնագիրը արդէն վաւերացուած է Լաթվիոյ, Լիթուանիոյ, Էսթոնիոյ, Պուլկարիոյ, Լեհաստանի եւ Լիքսամպուրկի կողմէ:

11 ապրիլին համաձայնագիրը միաձայնութեամբ վաւերացուեցաւ նաեւ Հայաստանի Ազգային ժողովի կողմէ:

27 յունիսին համաձայնագիրը վաւերացուած էր նաեւ Ռումանիոյ խորհրդարանի ստորին պալատին կողմէ:

Պրիքսելի Մէջ Փաշինեան – Մաքրոն Հանդիպում

Պրիքսել գտնուող վարչապետ Նիկոլ Փաշինեան ՕԹԱՆ-ի կեդրոնատեղիին մէջ հանդիպում ունեցած է Ֆրանսայի Հանրապետութեան նախագահ Էմմանուէլ Մաքրոնի հետ:

Վարչապետ Նիկոլ Փաշինեան ընդգծած է, որ Հայաստանը մեծապէս կը գնահատէ Ֆրանսայի հետ ձեւաւորուած առանձնաշնորհեալ յարաբերութիւնները՝ հիմնուած երկու ժողովուրդներու աւանդական բարեկամութեան եւ փոխադարձ յարգանքին վրայ: «Մեզի համար մեծ պատիւ է հիւրընկալել Ֆրանսախօս երկիրներու միջազգային կազմակերպութեան 17-րդ վեհաժողովը: Յանձնառու ենք անիկա ամենէն բարձր մակարդակով կազմակերպելուն: Շնորհակալ ենք Ֆրանսային՝ նախապատրաստական աշխատանքներուն մէջ ցուցաբերուող աջակցութեան համար», ըսած է Հայաստանի վարչապետը՝ աւելցնելով, որ վեհաժողովի ընթացքին մեծ ուշադրութիւն պիտի տրուի նաեւ տնտեսական բաղադրիչին. կը նախատեսուի կազմակերպել ֆրանսախօս երկիրներու գործարարներու եւ գործատուներու պիզնես ֆորում եւ այդ ֆորումին հիմամբ ստեղծել ֆրանսախօս երկիրներու գործարարներու ցանց: Վարչապետ Նիկոլ Փաշինեան համոզմունք յայտնած է, որ Էմմանուէլ Մաքրոնի պետական այցելութիւնը

Հայաստան եւ մասնակցութիւնը վեհաժողովին այդ կարեւոր նախաձեռնութիւնը աւելի հնչեղ պիտի դարձնէ թե՛ Հայաստանի եւ թե՛ ամբողջ ֆրանսախօս համայնքին համար:

Էմմանուէլ Մաքրոն շնորհաւորած է Նիկոլ Փաշինեանը Հայաստանի վարչապետի պաշտօնին ընտրուելու առիթով եւ կարեւոր նկատած Հայաստանի մէջ տեղի ունեցած իրադարձութիւններու խաղաղ, ժողովրդավարական ճամբով հանգուցալուծումը: Ֆրանսայի նախագահը ընդգծած է, որ իր երկիրը պատրաստ է շարունակելու բարեկամ Հայաստանի հետ սերտ համագործակցութեան ընդլայնման ուղղուած ջանքերը՝ տարբեր մարզերու մէջ, որոնց կարգին՝ առեւտրական-տնտեսական: Էմմանուէլ Մաքրոն վստահութիւն յայտնած է, որ Ֆրանսախօս երկիրներու վեհաժողովը Երեւանի մէջ պիտի կազմակերպուի բարձր մակարդակով եւ յոյս յայտնած, որ Հայաստան կատարելիք այցելութեան ընթացքին կարելիութիւն ըլլայ աւելի առարկայականօրէն քննարկելու հայ-ֆրանսական կապերու հետագայ խորացման ու ամրապնդման ուղղուած հարցերն ու նախագիծերը:

Զրուցակիցները անդրադարձ կատարած են նաեւ Ղարաբաղեան տագնապին եւ կարեւոր նկատած անոր լուծումը խաղաղ բանակցային հոլովոյթի միջոցով՝ ԵԱՀԿ Մինսքի խմբակի համանախագահութեան ձեւաչափի շրջագիծին մէջ: Վարչապետ Նիկոլ Փաշինեան բարձր գնահատած է համանախագահ երկիրներու, որոնց շարքին Ֆրանսայի ջանքերը՝ ուղղուած Ղարաբաղեան տագնապի խաղաղ հանգուցալուծման եւ շրջանին մէջ կայունութեան ապահովման: Վարչապետը ընդգծած է, որ Հայաստանը հաւատարիմ է Մինսքի խմբակի համանախագահներու միջնորդութեամբ իրականացուող բանակցային հոլովոյթին եւ աւելցուցած, որ տագնապի լուծման որեւէ զինուորական փորձ պէտք է դիտարկել իբրեւ ոտնձգութիւն ժողովրդավարութեան եւ մարդու իրաւունքներու դէմ:

Վարչապետ Փաշինեան Պրիւքսելի Մէջ Հանդիպում Ունեցած է Քառնէկի Կեդրոնի Փորձագէտներու Հետ

Վարչապետ Նիկոլ Փաշինեանի Պելձիքա կատարած աշխատանքային այցելութեան առաջին կայանը եղած է «Քառնէկի Եւրոպա» հետազօտական կեդրոնը: Այդտեղ ան հանդիպում ունեցած է կեդրոնի փորձագէտներուն, ինչպէս նաեւ Եւրոպական Միութեան շարք մը բարձրաստիճան պաշտօնեաներուն հետ:

Վարչապետը նախ անդրադարձած է Հայաստանի մէջ տեղի ունեցած ոչ բռնի, խաղաղ թաւշեայ յեղափոխութեան ու ընթացող փոփոխութիւններուն, ներկայացուցած է փտածութեան դէմ պայքարի ուղղութեամբ կառավարութեան ձեռնարկած քայլերը, գործադիրի միւս առաջնահերթութիւնները, որոնց շարքին՝ տնտեսութեան ոլորտի, Հայաստան-Եւրոպական Միութիւն յարաբերութիւններու մէջ եւ պատասխանած է ներկաներու շարք մը հարցումներուն: «Մենք յաղթահարած ենք մեր սեփական վախերը եւ իրագործած սիրոյ եւ համերաշխութեան յեղափոխութիւն՝ վերացնելով ինքնավերարտադրուող իշխանութիւնը՝ այսպիսով մենք զմեզ եւ աշխարհին յայտարարելով, որ երբեք այլեւս թոյլ պիտի չտանք, որ մէկ



անձը որոշում կայացնել բոլորին անունով: Հայաստանի քաղաքացին յաղթահարած է այնպիսի արատաւոր երեւոյթներ, ինչպիսիք են՝ փտածութիւնը, անարդարութիւնը, ոչ արդիւնաւետ կառավարումը: Մենք կը գտնուինք արագ փոփոխութիւններու օգնութեամբ աւելի բարգաւաճ, ներառական եւ արդիականացուած Հայաստան կերտելու նոր փուլին մէջ», ըսած է վարչապետ Նիկոլ Փաշինեան: Կառավարութեան ղեկավարը ընդգծած է, որ տեղի ունեցած յեղափոխութեան մէջ գոյութիւն չունի աշխարհաքաղաքական ենթահող, եւ նոր կառավարութիւնը չի ծրագրեր որեւէ արտաքին քաղաքականութեան առանցքային փոփոխութիւններ կամ կտրուկ շրջադարձներ: «Հայաստանի նոր կառավարութիւնը պիտի ձեռնարկէ անհրաժեշտ բոլոր քայլերը, որպէսզի արմատախիլ ըլլան մեր զարգացումը դանդաղեցնող բոլոր խոչընդոտները», նշած է վարչապետը:

«Մեր աշխարհագրական դիրքը, խոր գիտելիքներով եւ միջմշակութային կապերով օժտուած մարդկային պաշարները, հաւասարակշիռ արտաքին քաղաքականութիւնը երկրի մրցունակութեան յատկանիշներն են, եւ մեր հասարակութիւնը ինձի վստահութիւն կը ներշնչէ, որ մենք ճիշդ ճամբուն վրայ ենք: Մենք Եւրասիական տնտեսական միութեան լիիրաւ անդամ ենք, ինչ որ մեր տնտեսական զարգացման համար հսկայական կարելիութիւններ բացած է: Հայաստանը պատրաստ է կամրջելու Եւրասիական տնտեսական միութեան եւ Եւրոպական Միութեան շահերն ու դիրքորոշումները, որքանով անիկա ընդունելի ըլլայ երկու կողմերուն համար», ընդգծած է վարչապետ Փաշինեանը:

Անդրադառնալով Հայաստանի եւրոպական օրակարգին՝ կառավարութեան ղեկավարը նշած է, որ Եւրոպական Միութիւնը Հայաստանի համար եղած է կարեւոր գործընկեր համապարփակ հաստատութենական եւ իրաւական բարեփոխումներու իրականացման գործին մէջ:

Խօսելով Լեռնային Ղարաբաղի տագնապին մասին՝ վարչապետը ընդգծած է, որ Հայաստանը հաւատարիմ է տագնապի խաղաղ լուծման՝ հիմնուած ԵԱՀԿ-ի Մինսքի խմբակի համանախագահներուն կողմէ առաջարկուող սկզբունքներու եւ մօտեցումներու վրայ: «Արցախի ժողովուրդի ինքնորոշումը այլընտրանք չունի: Տագնապի լուծումը պէտք է հիմնուած ըլլայ բոլոր կողմերուն փոխզիջման վրայ: Ինչպէս որեւէ այլ ժողովրդավար երկիր՝ Հայաստանը յանձնառու է Լեռնային Ղարաբաղի տագնապը լուծելու բացառապէս խաղաղ ճամբով», ըսած է վարչապետ Նիկոլ Փաշինեան:

Նախագահ Բակո Սահակեանը Հանդիպում Ունեցած է ՀՅԴ Արցախի Կառոյցի Խումբ Մը Ներկայացուցիչներու Հետ

Արցախի Հանրապետութեան նախագահ Բակո Սահակեան 11 Յուլիսին սկսած է քաղաքական, հասարակական, կրթութեան, մշակոյթի, առողջապահութեան, արտադրական ենթակառուցուածքներու, գիւղատնտեսութեան եւ այլ մարզերու ներկայացուցիչներու հետ ներքաղաքական եւ արտաքին հարցերու շուրջ հանդիպումներու շարքի մը:

Նոյն օրը երկրի ղեկավարը հանդիպում ունեցած է Հայ յեղափոխական դաշնակցութեան խումբ մը ներկայացուցիչներու հետ՝ ՀՅԴ Արցախի Կեդրոնական կոմիտէի ներկայացուցիչ Դաւիթ Իշխանեանի գլխաւորութեամբ:

Տեղի Ունեցած Է Հայաստանի Եւ Ազրայէճանի Արտաքին Գործոց Նախարարներու Հանդիպումը

Չորեքշաբթի օր՝ 11 Յուլիսին, Պրիւքսելի մէջ տեղի ունեցած է Հայաստանի եւ Ազրայէճանի արտաքին գործոց նախարարներու հանդիպումը: Այս մասին իր թուիթթրեան էջով կը տեղեկացնէ արտաքին գործոց նախարարութեան մամլոյ բանբեր Տիգրան Բալայեան:

Մինչ այդ տեղի ունեցած էր նաեւ Հայաստանի Հանրապետութեան արտաքին գործոց նախարար Զոհրապ Մնացականեանի եւ ԵԱՀԿ-ի Մինսքի խմբակի համանախագահներու հանդիպումը:

ՕԹԱՆ-ի Հոչակագիրին Մէջ Անդրադարձ Կայ Հայաստանին, Ազրայէճանին, Վրաստանին Ու Մոլտովային

ՕԹԱՆ-ի՝ Պրիւքսելի մէջ տեղի ունեցած վեհաժողովի հոչակագիրին մէջ Հայաստանին եւ շրջանի երկիրներուն մասին մէկ պարբերութիւն կայ, որուն մէջ ըսուած է.

«Մենք կը շարունակենք աջակցիլ մեր բոլոր գործընկերներու իրաւունքին՝ անկախ եւ ինքնուրոյն որոշումներ կայացնելու արտաքին եւ անվտանգութեան քաղաքականութեան հարցով՝ ազատ մնալով արտաքին ճնշումներէ եւ հարկադրանքէ:

Մենք կը շարունակենք աջակցիլ Հայաստանի, Ազրայէճանի, Վրաստանի եւ Մոլտովայի



տարածքային ամբողջականութեան, անկախութեան եւ ինքնիշխանութեան: Այս ծիրին մէջ, մենք կը շարունակենք աջակցիլ Հարաւային Կովկասի, ինչպէս նաեւ Մոլտովայի Հանրապետութեան մէջ տագնապներու խաղաղ լուծման ուղղուած ջանքերուն՝ միջազգային իրաւունքի սկզբունքներուն եւ չափանիշներուն, ինչպէս նաեւ ՄԱԿ-ի Կանոնադրութեան եւ Հելսինքիի եզրափակիչ փաստաթուղթին համապատասխան»:

ՄԻՋԱԶԳԱՅԻՆ

Թրամփ-Մերքել Բանավեճ

Միացեալ Նահանգներու նախագահ Տանըլտ Թրամփի Չորեքշաբթի օր Պրիւքսելի մէջ ՕԹԱՆ-ի երկօրեայ վեհաժողովի նախօրեակին Ռուսիոյ ազդեցութեան եւ պաշտպանական մարզի ծախսերու շուրջ բանավեճ մը ունեցաւ Գերմանիոյ վարչապետ Անկելա Մերքելի հետ:

Պրիւքսելի մէջ ՕԹԱՆ-ի ընդհանուր քարտուղար Ենս Սթոյթենպերկի հետ նախաճաշի ընթացքին Թրամփի յայտնեց. «Գերմանիան ամբողջութեամբ Ռուսիոյ վերահսկողութեան տակ է, որովհետեւ անոնք իրենց ուժանիւթի 60-էն 70 առ հարիւրը պիտի առնեն Ռուսիայէն եւ նոր խողովակաշարէ մը, եւ դուք ըսէք, եթէ այդ մէկը պատշաճ է, որովհետեւ կը կարծեմ պատշաճ չէ եւ կը կարծեմ, որ ՕԹԱՆ-ի համար շատ վատ է»:

«Գերմանիան անոնց (ռուսերուն, «Ա.») պատանդն է: Մենք որոշակիօրէն պետք է ատոր ուշադրութիւն դարձնենք», ըսաւ ան:

Թրամփ նաեւ Գերմանիան ամբաստանեց իր տնտեսական կարողութեան միայն շուրջ 1 առ հարիւրը պաշտպանութեան մարզին վրայ ծախսելու յանգանքով, մինչ Միացեալ Նահանգներ կը ծախսեն՝ 4,2 առ հարիւրը: «Յարմար չէ, որ ՕԹԱՆ պաշտպանէ Պերլինը, մինչ վերջինս ուժանիւթի դիմաց միլիառաւոր տոլարներ կը վճարէ Ռուսիոյ», նշեց Թրամփ:

Մերքել հակադարձեց՝ ընդգծելով, որ Գերմանիան գերիշխան պետութիւն է, եւ Սպիտակ տան ղեկավարի քննադատութիւնը տեղին չէ:

«Այս առիթով կ'ուզէի ըսել, որ ես անձամբ հետեւած եմ, թէ ինչպէս Գերմանիոյ մէկ մասը վերահսկուած է Խորհրդային Միութեան կողմէ: Ես այսօր շատ ուրախ եմ, որ ազատութեան մէջ միացած ենք», ըսաւ ան՝ աւելցնելով, որ այժմ Գերմանիան ինքնուրոյն քաղաքականութիւն կը վարէ եւ իր սեփական որոշումները կու տայ:

Ան ընդգծեց, որ Գերմանիան իր զինուորներէն մեծ թիւ մը դրաւ ՕԹԱՆ-ի տրամադրութեան տակ: «Տակաւին մեծապէս առնչուած ենք Աֆղանիստանին եւ ուստի նաեւ կը պաշտպանենք Միացեալ Նահանգներու շահերը... Եւ Գերմանիան ուրախ էր ատիկա ընելու եւ այդ մէկը կատարեց համոզումէ մղուած», ըսաւ Գերմանիոյ վարչապետը:

Թրամփ նախապէս ոմանց ապշեցուց, երբ ըսաւ, թէ ՕԹԱՆ-ի վեհաժողովը կրնայ աւելի դժուար ըլլալ, քան յառաջիկայ երկուշաբթի Ռուսիոյ նախագահ Վլատիմիր Փութինի հետ վեհաժողովը:

Ան յայտնեց, որ Միացեալ Նահանգներ «կը շահագործուին» ՕԹԱՆ-ի մնացեալ անդամներուն կողմէ:

Եւրոպական խորհուրդի նախագահ Տոնալտ Թուսք զինք ամբաստանեց «գրեթէ անօրեայ կերպով» Եւրոպան քննադատելու յանգանքով: Թուսք «Թուիթըր»-ի վրայ գրեց. «Միքելի՛ Ամերիկա, գնահատէ՛ դաշնակիցներդ, ի վերջոյ անոնք այդքան ալ շատ չեն»:

Չինաստան Միացեալ Նահանգները Կ'ամբաստանէ Երկու Երկիրներու Առեւտրական Ցարաբերութիւնը Փճացնել Զգտելու Ցանցանքով

Չինաստան, մեկնաբանելով չինական ապրանքներու ներածումին վրայ տարեկան 200 միլիարտ տոլար մաքսատուրքեր հաստատելու Ուաշինկթընի քայլը, Միացեալ Նահանգները ամբաստանեց երկու երկիրներուն միջեւ առեւտրական յարաբերութիւնը փճացնելու յանցանքով:

Չինաստանի առեւտուրի փոխնախարար Լի Շինկանկ Փեքինի մէջ տեղի ունեցած խորհրդածողովի մը ընթացքին յայտնեց. «Չինաստանի եւ Միացեալ Նահանգներու միջեւ փոխադարձ եւ լայնածաւալ մաքսատուրքերու յաւելումը անխուսափելիօրէն պիտի առաջնորդէ չին-ամերիկեան առեւտուրի փճացման»:



«Այս քայլերը ժխտական ազդեցութիւն պիտի ունենան տնտեսական համաշխարհայնացման վրայ եւ պիտի վնասեն տնտեսութեան միջազգային համակարգին», ըսաւ ան:

Չինացի պաշտօնատարը իր երկրին եւ Միացեալ Նահանգներու որդեգրած փոխադարձ քայլերը նկատեց «միջազգային առեւտուրին մէջ քառսային ժամանակ»՝ աւելցնելով. «Երկու երկիրներուն ընկերութիւնները վնասներ պիտի կրեն: Առեւտրական պատերազմին մէջ յաղթականներ չկան: Չինաստանի եւ Միացեալ Նահանգներու միջեւ գործակցութիւնը միակ ճիշդ ընտրանքն է»:

«Ըստ երեւոյթին, Միացեալ Նահանգներ առեւտրական այս բախումներուն մէջ մագլցումի կը դիմեն», նշեց ան՝ զգուշացնելով. «Առեւտրական բախումներուն ժխտական հետեւանքները արդէն սկսած են իրապէս երեւիլ»:

Ազրպեյճան Եւ Իսրայէլ Նոր Տեսակի Անօդաչու Թռչող Սարքերու Միացեալ Արտադրութեան Համաձայնագիր Ստորագրած Են

Ազրպեյճանի պաշտպանական արդիւնաբերութեան նախարարութիւնը եւ իսրայէլեան «Էրոնտօրիքս» ընկերութիւնը նոր տեսակի անօդաչու թռչող սարքերու միացեալ արտադրութեան վերաբերեալ համաձայնագիր ստորագրած են: Ազրպեյճանական «Մինվալ» կայքը կը հաղորդէ, որ այդ մասին յայտնած է Ազրպեյճանի պաշտպանական արդիւնաբերութեան նախարարութիւնը:

Փաստաթուղթը ստորագրուած է Ազրպեյճանի պաշտպանական արդիւնաբերութեան փոխնախարար Եահիա Մուսայելի եւ իսրայէլեան ընկերութեան տնօրէններու խորհուրդի ղեկավար Ետիտիա Եասրինի հանդիպումին ընթացքին:

Կողմերը ընդգծած են տարբեր տեսակի անօդաչու թռչող սարքեր արտադրող «ԱԶՍՏ Միսթեմ» միացեալ ձեռնարկութեան բարեյաջող աշխատանքը:

Շոյկու. «Սուրիա Չիւնդրեց, Որ Իրեն «Էս-300» Մատակարարենք, Սակայն Պատրաստ Ենք Այդ Հարցը Քննելու»

Ռուսիոյ պաշտպանութեան նախարար Սերկէյ Շոյկու յայտնեց. «Միացեալ Նահանգներ Իրաքի եւ Լիպիոյ մէջ իրողապէս փորձարկուած նոր գաղութատիրական ռազմավարութիւն կը գործադրեն»:

«Մենք բազմիցս Փենթակոնի ղեկավարը հրաւիրեցինք քննարկելու միջազգային կամ շրջանային անվտանգութիւնը, սակայն Ուաշինկթըն տակաւին պատրաստ չէ այդպիսի երկխօսութեան», ըսաւ ան:

Շոյկու շեշտեց. «Միացեալ Նահանգներ ոչ իսկ մէկ սենթ տրամադրեցին մինչեւ իսկ Ռաքքայի մէջ վնասներ կրած սուրիացիներուն»:

Ռուսիոյ պաշտպանութեան նախարարը յայտնեց. «Իրան եւ Թուրքիա Սուրիոյ մէջ կացութեան կայունացման հիմնական դերերէն մէկը ստանձնած են»:

«Դամասկոս Մոսկուայէն չիւնդրեց իրեն «Էս-300» համակարգեր մատակարարել, սակայն Ռուսիան պատրաստ է այդ հարցը քննարկելու», ըսաւ ան:

Ան նաեւ նշեց. «Իրանի եւ Իսրայէլի միջեւ լարուածութիւնը պէտք է լուծել երկխօսութեան ճամբով եւ ոչ թէ ուժի կիրարկումով»:

ԱԿՆԱԼԿ

Անկրկնելի Երազներու Կրկնութեան Սպասումով

Առանձին կը բնակէր կրթական հաստատութեան խոնարհ ծառան, ուղեղին մէջ ամփոփուած գիրքերու ծանրութեան հետ կը շալկէր նաեւ իր իւրաքանչիւր աշակերտի հոգն ու դժուարութիւնները: Վարժարան չուղարկեց իր սեփական զաւակը, զաւակ չունեցաւ ան, սակայն ունեցաւ աւելի քան 500 աշակերտի հոգը, առօրեայ դժուարութիւնները, չպարզեատրուեցաւ, «բարձունք»-ներու չհասաւ, ամսականի յաւելում ալ չպահանջեց, վաստակած քիչ գումարը իր աշխատած հաստատութեան



կտակեց: Այլասիրութեան բնատրութեան պատճառով պարտք ալ ունեցաւ, տագնապներով լեցուն կեանք մը, թէեւ ասիկա իրեն հաճոյք կը պատճառէր, մաշեցուց ամէն ուժ եւ տաղանդ՝ վասն այդ հաճոյքի գոյութեան պահպանման, միս ու ոսկոր, հոգի, իր շունչէն տուաւ աշակերտէն մարդ ստեղծելու ակնկալութեամբ եւ աստուածացաւ... այո՛, իր մտածումով, հոգիով, աշխատանքով եւ ապրելակերպով աստուածացաւ աշակերտին համար: Եւ այսպէս ապրեցաւ այս անկրկնելի մարդ-ուսուցիչը, երազէ հիւսուած մարդը, որ Չորեքշաբթի օր տուն վերադարձիս ճամբուն վրայ ստեղծեցի, որ մեր այսօրուան ապրող իրականութեան մէջ գոյութիւն չունի: Այո՛, միայն երազային տիպարներն են, որ անկրկնելի կ'ըլլան... Երազները անկրկնելի են արդէն:

Այսօրուան մեր փնտռտուքի առաջնահերթութիւններէն է ասիկա: Դաստիարակներու, երազային դաստիարակներու գոյութեան իրականացումը, որոնց գործը ուսուցչութենէ, դասատուութենէ շա՛տ աւելին է:

Այսօրուան մեր գործը պիտի ըլլայ անիկա: Գործը սպասելն է: Դաստիարակները չեն ստեղծուիր, բարձրագոյն կրթութեամբ ձեռք բերելիք հմտութիւն մը չէ անիկա: Դաստիարակ ըլլալը հոգեվիճակ է եւ ապրում, բնածին տաղանդ է, որուն համար հաւաքականութիւնները միայն սպասել կրնան՝ երազի մը իրականացման յոյսով:

Եւ այսպէս, երազի մը իրականացման ակնկալութեամբ, երազելով՝ պիտի սպասենք երազային մարդոց ծնունդին: Սակայն, այս բոլորէն առաջ, նախապայմանը երազելու ցանկութիւնն է:

ՏԻՒՆ

ԼՈՒՐԵՐ ԳԱՂՈՒԹՆԵՐԷՆ

Ղեսպան Արշակ Փոլատեանի «Կողոպտուած Երագանքի Ծնունդը» Մենագրութեան Շնորհահանդէպը

Հովանաւորութեամբ Սուրիոյ մշակոյթի նախարար Սոհամետ Ահմատի, 4 Յուլիսին Դամասկոսի «Ասատ» Ազգային գրադարանին մէջ տեղի ունեցաւ Սուրիոյ մէջ Հայաստանի ղեսպան, պատմական գիտութիւններու դոկտոր, փրոֆ. Արշակ Փոլատեանի՝ Հայաստանի Ա. Հանրապետութեան հիմնադրման 100-ամեակին նուիրուած «Կողոպտուած Երագանքի Ծնունդը» արաբերէն մենագրութեան շնորհահանդէպը:



Ելոյթ ունեցան Սուրիոյ խորհրդարանի երեսփոխան, պատմական գիտութիւններու թեկնածու Նորա Արիսեանը եւ սուրիացի հանրաճանօթ մտաւորական ու հրապարակախօս, Սուրիոյ խորհրդարանի անդամ, «Տար ալ Շարք» հրատարակչութեան տնօրէն դոկտ. Նապիլ Թոռմէն: Բանախօսները շեշտեցին, որ ղեսպան Փոլատեանին գիրքը իր տեսակին մէջ բացառիկ է՝ որպէս հայ ժողովուրդի նորագոյն պատմութեան կարեւորագոյն եւ բախտորոշ ժամանակաշրջանին՝ հայոց պետականութեան վերականգնումին մասին արաբերէն մենագրութիւն: Անոնք բարձրօրէն գնահատեցին ղեսպանին գիտական գործունէութիւնը եւ աշխուժ ներդրումը արաբական աշխարհին, յատկապէս Սուրիոյ հայագիտական ուսումնասիրութիւններու ասպարէզէն ներս:

Իր խօսքին մէջ ղեսպան Արշակ Փոլատեանը ըսաւ, որ այս մենագրութիւնը գիտաճանաչողական աշխատութիւն է, որ առաջին անգամ արաբերէն լեզուով համապարփակ գիտելիք կը ներկայացնէ հայ ժողովուրդի նորագոյն պատմութեան, յատկապէս՝ 20-րդ դարու

առաջին տասնամեակներու ազգային-ազատագրական պայքարին եւ անկախութեան հռչակման մասին:

Գիրքին մէջ ներկայացուած են այդ շրջանին Հայաստանի մէջ դեկավար պաշտօններ ստանձնած այրերու յուշեր, նամակներ եւ այլ փաստաթուղթեր, որոնք լոյս կը սփռեն հայոց անկախութեան առաջին փորձառութեան դժուարութիւններուն վրայ:

Նպաստ Հալէպահայ Զինուորներուն

Ներկայութեամբ Բերիոյ հայոց թեմի առաջնորդ Շահան արք. Սարգիսեանի, 26 յունիսին, Սուրիահայութեան շտապ օգնութեան եւ վերականգնումի Հալէպի գործադիր մարմինը Ս. Աստուածածին եկեղեցոյ ներքնասրահին մէջ կազմակերպեց հանդիպում մը՝ սուրիական բանակի հալէպահայ զինուորներուն եւ պահեստային զօրահաւաքի հրաւիրուած



զինուորներուն յատուկ, որուն ընթացքին նիւթական նուէրներ բաշխեց անոնց:

Այս առիթով սրբազան հայրը մեծապէս գնահատեց Սուրիոյ պատերազմի տարիներուն անոնց քաղաքացիական բարձր գիտակցութիւնն ու ծառայութեան ոգին, աւելցնելով, որ հայ համայնքը հպարտ է իր քաջարի երիտասարդներով, որոնք առանց ընկրկելու՝ մասնակցեցան Սուրիոյ պաշտպանութեան:

www.aztarar.com

ԹՈՒՄՕ-ի Կեդրոնի Հանրային Պաշտոնական Ներկայացում



28 յունիսին Փարիզի մեջ տեղի ունեցավ «ԹՈՒՄՕ-Փարիզ» կեդրոնի հանրային պաշտոնական ներկայացումը՝ ներկայութեամբ քաղաքապետ Անն Հիտակոյի եւ ԹՈՒՄՕ-ի գործադիր տնօրէն Մարի-Լու Փափազեանի:

Ձեռնարկին ընթացքին յայտարարուեցաւ, որ «ԹՈՒՄՕ-Փարիզ»-ը իր աշխատանքներուն պիտի սկսի 25 սեպտեմբերին, «Ֆորում տէ գ'իմաժ» կեդրոնին մէջ:

«ԹՈՒՄՕ-Փարիզ»-ը, ԹՈՒՄՕ ստեղծարար արհեստագիտութիւններու կեդրոնի միջազգային առաջին կեդրոնն է: Անիկա անվճար կրթութիւն

պիտի ապահովէ 12-18 տարեկան մօտաւորապէս 1500 պատանիներու: Կեդրոնին մէջ ուսանողները կարելիութիւնը պիտի ունենան ուսումնասիրելու բազմաթիւ ոլորտներ, որոնց շարքին՝ ժապաւէններու պատրաստութիւն, ծրագրաւորում, «կրաֆիք տիզայն», խաղերու պատրաստութիւն, եռաչափ ձեւաւորում, նկարչութիւն եւ երաժշտութիւն: «ԹՈՒՄՕ-Փարիզ»-ը կը գտնուի Ֆրանսայի ամենամեծ կեդրոնական կայարանին կից, եւ ըստ քաղաքապետ Անն Հիտակոյի, ԹՈՒՄՕ-ն պիտի դառնայ երիտասարդութեան հաղորդակցութեան խաչմերուկ, ուր անոնք ոչ միայն պիտի կարենան ձեռք բերել նոր հմտութիւններ, այլ նաեւ պիտի կարենան իրագործել իրենց ամենաստեղծագործ գաղափարներն ու թուային փորձարկումները:

Կեդրոնի բացման գաղափարը ծնաւ 2016-ին, երբ Երեւանի ԹՈՒՄՕ իր այցելութեան ընթացքին, այս գաղափարով սքանչացած, Անն Հիտակոյ կեդրոնի պատասխանատու Մարի-Լու Փափազեանին հետ համաձայնեցաւ Փարիզի մէջ եւս նման կեդրոն մը բանալ:

Աշխատանքային բազմաթիւ այցելութիւններէ ետք ծրագիրը յարմարեցաւ ֆրանսականին եւ, ամէն ինչ ապահովելէ ետք, «ԹՈՒՄՕ-Փարիզ»-ը արդէն գրեթէ պատրաստ է բացումի:

3 Յուլիսին փարիզեան կեդրոնին վերջերս միացած աշխատակիցները Ֆրանսայէն կը ժամանեն Երեւանի ԹՈՒՄՕ՝ սկսելու վերապատրաստման աշխատանքները:

ԹՈՒՄՕ-ի գործադիր տնօրէն Մարի-Լու Փափազեանը նկատել տուաւ, որ «ԹՈՒՄՕ-Փարիզ»-ի բացումը շատ կարեւոր իրադարձութիւն է, եւ այդ քայլով կը սկսի իրենց միջազգային տարածումը, որ թոյլ պիտի տայ ԹՈՒՄՕ-ի կրթական նոր մեթոտները հասանելի դարձնել միջազգային հանրութեան՝ նոյն ժամանակ ապահովելով Հայաստանի մէջ 25 ԹՈՒՄՕ կեդրոններ բանալու համար անհրաժեշտ նիւթականը եւ մարդուժը: Նշենք, որ «ԹՈՒՄՕ-Փարիզ»-ի տնօրէնութեան պատասխանատու պաշտօնին նշանակուած է ֆրանսահայ Կորին Խաչատուրեանը:

Սուրիահայ Լուսանկարիչ Յակոբ Վանէսեանը Արժանացաւ Մրցանակի

Վերջերս Փարիզի մէջ կայացած լուսանկարչական մրցումին մրցանակի արժանացաւ սուրիահայ լուսանկարիչ Յակոբ Վանէսեանը:

Ան մրցումին մասնակցած էր «Պատերազմ» բաժինին մէջ, ուր ներկայացուցած էր «Պատերազմի ճարտարապետութիւն», «Տարբեր պատմութիւններ» եւ «Պատերազմի



դիմանկար» խորագիրով երեք լուսանկարներ:

Նշենք, որ 1970-ին Հալէպ ծնած լուսանկարիչ Յակոբ Վանէսեանը մասնագիտութեամբ արձաթագործ է. ան նկարչութեամբ կը զբաղի սիրողական մակարդակով: Սուրիոյ պատերազմին ընթացքին ան Հալէպի ժողովուրդին, տուներու եւ թաղամասերու իսկական պատկերները փաստագրած է նկարներու միջոցով՝ ցոյց տալով ժողովուրդին ապրած տառապանքը:

2014-ին ցուցահանդէսով հանդէս եկած է Դամասկոսի մէջ՝ ներկայացնելով «Հալէպ. քաղաքակրթութիւն եւ մոխիր» խորագիրով աշխատանքներու հաւաքածոն: 2015-ին «Մոռցուած մարդկութիւն» խորագիրին տակ ան մէկտեղած է լուսանկարներու շարք մը եւ զայն ցուցադրած՝ Նիւ Եորքի ՄԱԿ-ի շէնքին մէջ, իսկ 2016-ին՝ Ատանայի «Նազըմ Հիքմէթ» մշակոյթի կէդրոնին մէջ:

Անցեալ տարի ան իր մասնակցութիւնը բերաւ նաեւ լուսանկարներու մրցանակաբաշխութեան միութեան կողմէ կազմակերպուած մրցումի մը՝ արժանանալով մրցանակի՝ «Պատերազմ ու հականարտութիւն» բաժինին մէջ, իր «Վերջին նկար» խորագիրով լուսանկարին համար: Յայտնենք, որ Յակոբ Վանէսեանը նշանաւոր է իր սեւ ու սպիտակ նկարներով:

Հայկական Մշակույթի Ներկայացում

Նախաձեռնությամբ Սան Փաուլո քաղաքի Ներգաղթի թանգարանին 9, 10 եւ 16



յունիսին տեղի ունեցաւ «Ֆեսթօ սո իմիկրանթ» փառասօնը, որ իր շուրջ համախմբեց Պրազիլ ապրող 50 ազգութիւններու ներկայացուցիչներ:

Փառասօնին իր մասնակցութիւնը բերաւ նաեւ Համազգայինի Պրազիլի մասնաճիւղը, որ ներկայացուց հայկական մշակույթը, հայկական ճաշատեսակներ: Գեղարուեստական բաժինով հայկական «Սամա» ակումբին երգչախումբը մեկնաբանեց Երեւանի հիմնադրման

2800-ամեակին նուիրուած հայկական երգեր՝ մասնակցութեամբ հայկական երգերու մեկնաբան Վահագն Մինասեանի, իսկ Համազգայինի երեք մանկական պարախումբերը՝ «Արելիկ», «Կիլիկիա» եւ «Ծիրանի» ներկայացուցին հայկական ժողովրդական պարեր:

www.kantsasar.com

ԱՅԼԱԶԱՆ

Որո՞նք Են Այն Հինգ Միայները...

Անուշահոտի ընտրության եւ գործածության հետ կապուած կան 5 սխալներ, որոնցմէ պէտք է զգուշանալ, եթէ կ'ուզենք, որ անհկա մեր ճաշակին եւ մեր մորթին համապատասխան ըլլայ, երկար դիմանայ եւ ժամանակէն առաջ չհիննայ ու չծանրանայ: Ստորեւ կը ներկայացնենք անուշահոտի մասնագէտ Լեալի Կոթիէի 5 զգուշացումները:

1-Առանց Փորձելու Գնելը

Շատեր համացանցէն կարծիքներ քաղելով կամ վաճառող երիտասարդուհիին կարծիքին վստահելով եւ կամ բարեկամուհիի մը վրայէն հոտը առնելով՝ կուրօրէն անուշահոտ կը գնեն: Ծանուցումները իրենց կարգին շփոթի կը մատնեն... Այս փորձութիւններէն հեռու մնալով՝ պէտք է անպայման անուշահոտը փորձել՝ նախքան գնելը:

2-Միայլ Ձեռով Փորձելը

Անուշահոտը փորձելէն անմիջապէս ետք կարելի չէ զայն գնել: Պէտք է սպասել, որ ժամանակ անցնի, երկու-երեք ժամ, ինչո՞ւ չէ, ամբողջ օր մը, հետեւելու համար անոր բոյրի հոլովոյթին: Երբեք սխալ չէ, եւ ոչ ալ ամօթ՝ անուշահոտ փորձելը եւ յաջորդ օրը գնելը եւ թերեւս՝ հրաժարիլը:

3-Միայլ Ձեռով Պահելը

Այո՛, անուշահոտը պէտք է պահել լոյսէն եւ տաքէն հեռու: Յատկապէս կարելի չէ անուշահոտին սրուակը գետեղել բաղնիքի հայելիին առջեւ: Բաղնիքը այն տեղն է, ուր լոզանքի եւ շոգիի պատճառով ջերմաստիճանի մեծ ելեւէջներ կը պատահին: Նոյնպէս ալ կարելի չէ անուշահոտին սրուակը գետեղել շպարի սեղանին վրայ, ուր արեւին ճառագայթները մնայուն կը թափանցեն: Յարմարագոյնը պիտի ըլլայ սրուակը պահել պահարանին եւ կամ զգրոցին մէջ:

4-Մեծ Չափի Սրուակ Գնելը

Անուշահոտ գնելու ատեն նախապատուութիւնը տալ փոքր չափի սրուակներուն, նոյնիսկ եթէ մեծ սրուակին գինը անելի յարմար է: Փոքր սրուակով անուշահոտ գնելը ունի իր առաւելութիւնները, նախ՝ չի հիննար ու ծանրանար, իսկ բոյրէն ձանձրանալու պարագային, անհկա որոշ ժամանակ մը ետք կը սպառի, եւ նորը ընտրելու առիթ կը ստեղծուի:

5Չափազանցելը

Երբ անուշահոտ մը երկար ժամանակի վրայ գործածուի, զայն կրողը հոտին կը վարժուի եւ այն ստատորութիւնը կը ստեղծուի, որ բոյրը կորսնցուցած է իր ազդեցութիւնը:

Պէտք չէ չարաշահել անուշահոտին գործածութիւնը եւ անհանգստացնել շրջապատը:

Նորաձեւութեան Հետ Կապուած 10 Սխալ Սովորութիւններ

Հագուստները եղած են մեր վայելչութիւնը շեշտելու, մեր մարմինը արժեւորելու եւ, ինչո՞ւ չէ, կարգ մը թերութիւններ ծածկելու համար: Ստորեւ հակիրճ տողերով կը ներկայացնենք նորաձեւութեան հետ կապուած 10 սխալ սովորութիւններ, որոնք աւելի գէր տեսք կու տան մեր արտաքինին:




- 1.- Շատ մեծ չափի հագուստները, որոնք, ըստ ոմանց, «կը ծածկեն» մարմնին թերութիւնները:
- 2.- Շատ պզտիկ չափի հագուստները, որոնք մարմնին փակչելով՝ աւելի եւս կը շեշտեն թերութիւնները:
- 3.- Վերէն վար սեւ գոյնի հագուստ եւ քսեսուարներ կրելը:
- 4.- Հորիզոնական գծաւորը, խոշոր ծաղկաւորը, ինչպէս նաեւ գոյներու խառնարանը երբեք չեն յարմարիր գէր անձերուն: Մանր կէտաւորը, ուղղահայեաց նուրբ գծաւորը, մանր ծաղկաւորը եւ միագոյնը յանձնարարելի են բոլոր անոնց, որոնք աւելի նրբակազմ կ'ուզեն երեւիլ:
- 5.- Գոց օձիքները, մինչեւ վերջ կոճկուած շապիկները «կը խեղդեն» տեսքը:
- 6.- Խոշոր չափի մանեակներու, օղերու եւ ապարանջաններու կուտակումը:
- 7.- Անորակ կամ չափէ աւելի փոքր կրծկակները:
- 8.- Շատ կարճ, շատ նեղ ու փակած փեշերը հակամէտ են շեշտելու որոշ թերութիւններ:
- 9.- Տափակ կօշիկները, որքան որ ալ հանգստաւէտ ու գործնական ըլլան, անխուսափելիօրէն «կը կտրեն» մարմնին սլացքը:
- 10.- Ամէն գնով նորաձեւութեան կառչիլը:

Համեմներու Արքան` Հելը

Հնդկաստանի մէջ հելը որպէս դեղ արդէն իսկ օգտագործուած է ՔԱ 7-րդ դարուն: Համեմներու արքայ հելին կը վերագրուին բազմաթիւ բուժիչ յատկութիւններ:

Շեշտուած բոյրով հելը նաեւ կ'օգտագործուի սուրճի եւ թէյի պատրաստութեան մէջ: Անիկա համարուած է աշխարհի ամենասուղ համեմը՝ սաֆրանէն եւ վանիլայէն ետք:



Ստորեւ կը ներկայացնենք հելի բուժիչ յատկութիւններէն մէկ քանին.

- Կը բուժէ մարսողական խանգարումները:
- Կը դարմանէ միզային համակարգի խանգարումները:
- Կը չէզոքացնէ բերնի տհաճ հոտը:
- Կը կանխարգիլէ ակռաներու փտումը:
- Կը չափաւորէ արեան գերճնշումը:
- Կը հաւասարակշռէ շաքարի քանակը՝ արեան մէջ:
- Կը բարելաւէ շնչառութիւնը եւ կը մեղմացնէ ազմը:



Միքելի քայրեր եւ եղբայրներ,

Կը տեղեկացնենք ձեզի, որ Հ.Մ.Ը.Մ.-ի հիմնադրութեան 100ամեակի առթիւ 19-29 Յուլիս 2018ին, Հայաստանի մէջ տեղի պիտի ունենան պաշտօնական եւ հանրային շարք մը ձեռնարկներ: Վարչութեանս փափաքն է, որ բոլոր անոնք, որոնք վերոնշեալ ժամանակահատուածին պիտի գտնուին Հայաստանի մէջ, մասնակցին բոլոր ձեռնարկներուն:

Ստորեւ կը ներկայացնենք Հ.Մ.Ը.Մ.-ի հիմնադրութեան 100ամեակին նուիրուած պաշտօնական ձեռնարկներուն ցանկը-

- 23 Յուլիս 2018-ին, Վահան Չերազի արձանի բացում Կիւմրիի մէջ (մասնակցութեան սակն է 30\$, որ կ'ընդգրկէ փոխադրութիւնն ու ճաշը):
- 24 Յուլիս 2018-ին, պաշտօնական եւ սեղմ ընթրիք, որուն մասնակցելու համար ճշդուած է նուիրատուութեան նուազագոյն սակ:
- 26 Յուլիս 2018-ին, նախկին խմբապետներու հաւաք ու խորուկահանդէս (Քիւրական):
- 27 Յուլիս 2018-ին, Սրգսահանէս Գասիկ Սարգիսեանի կատարողութեամբ, Արամ Խաչատրեան համերգասրահէս ներս (տոմսերը ապահովելու համար կրնաք կապուիլ +374 93 625000 whatsapp-ի թիւին):
- 29 Յուլիս 2018-ին, Յաղթանակի Պարահանդէս, «Փարաուն» համալիրին մէջ (մասնակցութեան սակն է 100\$, իսկ 7-14 տարեկաններուն՝ 50\$):

Պաշտօնական ձեռնարկներուն մասնակցելու համար ձեր անունները վարչութեանս կրնաք փոխանցել միեւն Ուրբաթ, 13 Յուլիս 2018:

Մանօք

Յաւելեալ տեղեկութիւններու համար կրնաք կապուիլ Հ.Մ.Ը.Մ. Ք.Մ.Մ.-ի վարչութեան անդամներու հետեւեալ եղբայրներուն՝

- Եղբ. Միսն Օզճեան- հեռ. 50544989
- Եղբ. Արտաւազ Աճեմեան- հեռ. 50679888
- Եղբ. Ժագ Քանթեճեան- հեռ. 66264276

Եղբայրական բարեւեներով՝
Հ.Մ.Ը.Մ. Ք.Մ.Մ.-ի վարչութիւն